

顾华阳集

一
函
二
册
函

顧華陽集下卷

六十六世孫 球敬刻

六十九世孫 炳章重梓

文類

進高祖受命造唐賦表

臣況言臣聞上古滅跡以恢至道其次立名以扶大
化臣山谷之人頃為韓滉參謀滉性嫉惡臣性孤直
滉先朝露臣復故山陛下拔臣臣況口噤汗出不敢

論天下事然自開元天寶已來耳目所接精經茂德
畧有百人不霑一命非不欲出無益所以不出豈大
國無人而黨與之徒未詳菽麥驟居清貫此由權臣
上負明主下負蒼生中遏言路耳是非邪正勢不兩
立唐有天下賦斂甚薄刑罰甚寬神人保和鳥獸咸
若然而時有反側逋逃之誅得無因乎惟天啟聖無
有一物不得其所書曰遠人不服來以文德德猶土
也廣厚載物文猶火也光明麗天剋金之象生土之

義蓋聞朝出羣龍多士如海出夜光明月所以別好
惡而扇華夷未有影不從表聲不從聽聖德惟新頌
聲不作臣下之闕也謹進高祖受命造唐賦一篇論
皇家大慶歷祚延久悅若光靈促臣上獻伏惟陛下
赫赫巍巍與天同功鳳凰巢於阿閣麒麟乳於郊藪
臣之願也無任冰谷之怖謹奉表以聞臣況誠惶頓
首頓首謹言

如意輪畫銘并序

金剛記寶頂記花三昧頂輪三昧等經云蘇迷盧南
有俱露州州西南面夷羅國俱尸那城南去八千由
旬至於雪山茲山純白厥草肥膩高六十由旬周二
千二百拔提河在左長仙園在右清熱惱海在南跋
陀海在北善法堂在上瞽龍洞在下日月迴泊在俱
物羅奢半空脇是龍居此洞地堅牢恒沙諸佛成道
諸所如意輪於此山間佛言毗勒那鉢奢無忘無心
是離那奢多性本空是祇彌物都思觀身實相是悉

那鉢多彌觀佛亦是又問何者是陀羅尼相貌佛
言空觀心無為心廣大心常住心不變異心無無心
無無心是恒沙諸佛諸佛摩頂密語也言在身中恐
人輕教諸佛不許內外雙立非賢不轉如意輪本名
少足少法也其法滿足謂之少足與夫圓滿滿願廣
大大悲等慈慈觀智網寶手千手眼得無畏清淨光
除業道破諸暗無障礙無等等與夫普光慈明千光
王佛十億之號猶為至畧淨業宿王智佛時所立名

記普門願行此應見聞隨方說法法同而名異固云
賢劫中千佛助化此為一佛二尊不並願為侍者寶
德佛時名安忍童子請願之後名如意輪大悲菩薩
是愚於陰界畫彼真形法華經云一華獻畫像漸見
無量佛銘曰

同體如來所說總持法內外雙見為普門大悲廣運
無邊際已渡塵沙生滅海圓滿滿足各如意破除業
暗發光彩

太尉晉國公韓滉謚議

代太常博士
李谿暢當作

議曰韓滉天然風操自建名實馭下威重允凝績用
頃天下兵興務給財食月計億費王府一空中歲滉
領小司徒實專出納平準齒革之材貿遷虞衡之賦
邸無斂貨市均靡物加以嗇用殆復充盈洎擁旄吳
楚封略數千里盛名大烈望而斯畏嚴令山鎮不可
輕沮諭意維揚則張瑗之謀戢矣飛書斬將則沈清
之亂平矣采衛邦伯文武陪寮怙勢之徒負阻之族

莫不輶輶顛顛如也且天寶以來江左無物產資贍
文法浸寬貪夫徇財小人趨利求茲官者十恒八九
滉梔能制動絲克理勞過之所至刑必糾之非簡能
之不知方矯時而為理興元初姦宄偷變震驚我師
滉首獻方物奔貢漢中慶賜遂行邦用由濟貞元初
歲不有秋秦將歉食上憂乏用人心大搖滉發廩救
災不俟終日萬鍾繼至三輔斯給昔蕭何轉漕關中
寇恂資用河內皆以勤王幹蠱推功第一若敵而言

則滉之功非細也爰命作相咨以財計用統邦賦漢
粟誠多超古之才高謝主臣而已會登用日淺其道
未光然累行疇庸可得而擬謚法曰慮國忘家曰忠
安君不念已危曰忠滉安國荒饉濟君艱難屬時多
虞立權修賦危已從怨忘家在公得非忠乎謚法曰
剛德克就曰肅執心決斷曰肅滉剛而得位師克以
貞令出惟行刑其必犯得非肅乎臣聞舉善不必求
備易名是其大者昔謝琰定謚特以忠肅褒榮何曾

有子陽集 一
議謚詔以忠肅追美稽滉勲勞無忝前烈伏請謚曰
忠肅謹議

文論

周語之略曰孝敬忠信仁義智勇敢惠讓皆文也天
有六氣地有五行此十一者經緯天地協和神人名
之為文其實行也文顧行行顧文文行相顧謂之君
子之文為龍為光上古云言之無文行之不遠堯之
為君聰明文思文王既沒文不在茲乎文王之代草

木鳥獸皆樂文王之沼曰靈沼文王之臺曰靈臺虞
芮不識文王入文王里所見耕者讓畔行者讓路班
白不提挈自相謂曰吾黨之小子不可治於君子之
庭詩人美之云文王斷虞芮之訟晉文與楚子戰而
霸謚曰文公夫以伏羲之文造書契黃帝之文垂衣
裳重華之文除四凶舉八元周公之文布法於象魏
夫子之文木鐸徇路此其所以理文也伊尹之文放
太甲霍光之文廢昌邑呂尚之文殺華士穰苴之文

斬莊賈毛遂之文定楚從藺相如之文奪趙璧西門
豹之文引漳水沈女巫建安正始洛下鄴中吟詠風
月此其所以亂文也夫以文求士十致八九理亂由
之君臣則之堯舜禹湯有文桀紂幽厲無文太顛閔
天有文飛廉惡來無文昔霍去病辭第曰匈奴未滅
無以家為於國如此不得謂之無文范蔚宗著後漢
書其妻不勝珠翠其母唯薪樵一厨於家如此不得
謂之有文且夫日月麗於天草木麗於地風雅亦麗

於人是故不可廢廢文則廢天莫可法也廢天則廢地莫可理也廢地則廢人莫可象也郁郁乎文哉法天理地象人者也周易贊乾曰大哉乾元萬物資始贊坤曰至哉坤元萬物資生唯大者配乾至者配坤幽者頤鬼神明者頤禮樂不失於正謂之文

陰陽不測之謂神論

黃帝建立甲子考定星歷於是有天地神人之官少昊既衰神人雜擾顓頊命羲和以司之天地三苗九

黎不復亂逆周室既壞君不告朔漢道隆興方定餘

閏世時昭昧

一作方定大餘隨世昭昧

君平季生張衡索統陳訓

韓友卜珥京房管輅郭璞干寶樂房班固云陰陽抱
多忌以為無益嗟乎古論陰陽以和神人以順風雨
以播稼穡以除災害後之學者但張恢譎不自戒慎
以固親疎之道不精逆順之理不達性命之分而裁
衣拜官沐浴剪爪徵於歷日豈不悖哉左道亂正先
王無赦往見術者序卜筮之書及諸家祕訣七曜九

宮六壬三五

一作百

復返十精飛鳥天目地耳計神漢

歷以天赦母倉為吉祥歷以雲漢密莫為吉各生異
氣天竺聿法復與大演有差吾誰歸矣又以姓配音
以音配墓以墓配殺此莊惠以荒唐舛駁之論且黃
帝二十五子得其姓者十三人或以地為姓或以官
為姓或以謚為姓或以王父字為姓士會在虞為陶
唐氏在夏為御龍氏在商為豕韋氏在周為唐杜在
晉為范宣子在隨為隨武子在秦為劉氏女嫁欒黶

為析氏焉此一人之身改姓三改字五范蠡在陶為
朱公在齊為鴟夷子范雎稱張祿先生第五倫王伯
疑二字齊鮑永本姓包京房本姓李張良之後為留氏

田橫之後為王氏姓有兩字三字四字五字孰先孰
後孰是孰非長平同坑南陽同封時日或同吉凶或
異行年本命其事安在周時玉尺漢代黃鐘河汾鼎
氣沈埋自久不可抑則其道多門行則無盡不如也
是故文字非上學上學神聽原其性也集解非宗師